




საშურის მოახბე



№39 (460) 14 ოქტომბერი, ორშაბათი, 2024 წელი

საშურში წყალმომარაგებისა და წყალარინების სისტემის რეაბილიტაცია-მშენებლობის პროექტი გრძელდება

პროექტის ფარგლებში გათვალისწინებულია საშურის წყალმომარაგების და წყალარინების ქსელების გაუმჯობესების სამუშაოები, პირველი ფაზის



ფარგლებში გაუმჯობესდება ქალაქის ცენტრალური ნაწილის წყალარინების და მთლიანი ქალაქის წყალმომარაგების ქსელი

2025 წლის ბოლოდან დაგეგმილია ქ.საშურის მოსახლეობის 24-სთ-იანი წყალმომარაგებით უზრუნველყოფა, გათვალისწინებულია 200კმ



წყალმომარაგებისა და 45 კმ წყალარინების სრულიად ახალი ქსელის მოწყობის სამუშაოები

„მაღალი ტემპით მიმდინარეობს საშურის წყალმომარაგება-წყალარინების პროექტზე მუშაობა. 200 კმ ქსელიდან 150 კმ უკვე



მოწყობილია. პროგრესია წყალარინების მიმართულებითაც, სადაც სამუშაოების 40 % დასრულებულია. 2025 წლის ბოლომდე ქალაქ საშურს ექნება 24 სთ-იანი წყალმომარაგება. წყალარინების მიმართულებით კი სამუშაოები გაგრძელდება მნიშვნელოვანია, რომ ამ ეტაპზე, შიდა ქართლში პროექტები ხორციელდება 12 მდებარეობაზე. ჯამურად მათი ღირებულება 400 მილიონ ლარს აღემატება. პროექტების განხორციელების შედეგად, ოთხივე მუნიციპალურ ცენტრს კასპს, ქარელს, გორს და საშურს 24 სთ-იანი სტანდარტის შესაბამისი წყალმომარაგება ექნება. არის უზნები და მონაკვეთები სადაც ამორტიზირებულ ქსელს ესაჭიროება შესაბამისი რეაბილიტაცია ან სხვა ტიპის სამუშაოები, რაც ასევე გეგმის შესაბამისად არის გათვალისწინებული“ - ამის შესახებ რეგიონული განვითარებისა და ინფრასტრუქტურის მინისტრმა ირაკლი ქარსელაძემ ქალაქ საშურში წყალმომარაგების მიმდინარე სამუშაოების დათვალიერების შემდეგ განაცხადა

დამატებით მიმდინარეობს 30 მლნ ევროს ღირებულების სასესხო შეთანხმების პროცედურები, რათა ქალაქ საშურში სრულიად მოეწყოს წყალარინების ქსელი, რაც 85კმ-ი ქსელის მშენებლობასა და 4000 მიერთებას გულისხმობს. ამასთანავე, ენერგოეფექტურობის კომპონენტის ფარგლებში, წყალარინების გამწმენდი ნაგებობის ტერიტორიაზე დაგეგმილია მზის პანელების მოწყობა, რაც შემდგომში ელექტროენერჯის ხარჯს შეამცირებს

წყალმომარაგების ქსელის დასრულება დაგეგმილია 2025 წლის ბოლოსთვის
საშურის წყლისა და წყალარინების ინფრასტრუქტურის სამშენებლო სამუშაოებს საფრანგეთის განვითარების სააგენტოსა და ევროკავშირის ფინანსური მხარდაჭერითა და სახელმწიფო ბიუჯეტის თანადაფინანსებით 330 მლნ. ლარზე მეტი მოხმარდება

დააჯილდოეს წარმატებული პედაგოგები

მასწავლებლის საერთაშორისო დღის აღსანიშნავად, საშურის მუნიციპალიტეტის მერმა თენგიზ ჩიტიამვილიმა, მერის მოადგილე ზვიად გოგუაძემ და განათლების, კულტურის და სპორტის სამსახურის წარმომადგენლებმა წარმატებული პედაგოგები დააჯილდოეს.

როგორც ცნობილია, გასული წლიდან, საქართველოს მთავრობის გადაწყვეტილებით, ერთ-ერთი ყველაზე დამსახურებული და ღირსეული პროფესიის დაფასებისთვის დაწესებულია მასწავლებლის ეროვნული დღე და ეროვნული ჯილდო.

წელს საშურის სასკოლო საზოგადოებამ ეროვნულ პრემიაზე 6 საშურელი მასწავლებელი წარადგინა: ნათელა გოგალაძე სურამის მესამე საჯარო სკოლაში ისტორიის ასწავლის, ქეთევან გოგალაძე- საშურის მეორე საჯარო სკოლის ინგლისური ენის პედაგოგია, ნანა ლორთქიფანიძე მუსიკის მასწავლებელია საშურის მესამე საჯარო სკოლაში, ნუნუ ბიბილური სურამის მეოთხე საჯარო სკოლის გეოგრაფიის პედაგოგია, ნანა ჯოხაძე საქართველოს საპატრიარქოს წმ. დიმიტრი ყიფიანის სახელობის სკოლაში მუსიკას ასწავლის, ანა ტაბატაძე კი საშურის მეშვიდე საჯარო სკოლის ბიოლოგიის მასწავლებელია.

მუნიციპალიტეტის მერიისგან მასწავლებლის საერთაშორისო დღესთან დაკავშირებით ჯილდო სწორედ ამ პედაგოგებმა მიიღეს.



“წაღვლი - ფესტი - 2024” წარმატებით დასრულდა

2024 წლის 5 ოქტომბერს, წაღვლის საჯარო სკოლის ეზოში, საფუძველი ჩაეყარა ხაშურის მუნიციპალიტეტის გამყოფი ხაზის მიმდებარე სოფლების-წაღვლის, ზედა და ქვედა ბროლოსნის, კლდისწყაროს, ჩორჩანის და სხვათა ხალხური რეწვისა და კულინარულ ფესტივალს.

„წაღვლი-ფესტი 2024“-ის პროექტი USAID-ის ძლიერი სოფლის პროგრამის



მხარდაჭერით და ა(ა)იპ „ხაშურის მეწარმე ქალთა გაერთიანების“ ორგანიზებით განხორციელდა.

„ხაშურის მეწარმე ქალთა გაერთიანება“ ჯერ საინიციატივო ჯგუფად ჩამოყალიბდა, ხოლო 2023 წლის 6 აპრილს იურიდიულ პირად დარეგისტრირდა. ორგანიზაცია ამჟამად 67 მეწარმე ქალს აერთიანებს ხაშურის მუნიციპალიტეტიდან. თითოეული წევრი აქტიურად მონაწილეობს



საქართველოს მასშტაბით გამართულ გამოფენებში, გაყიდვებში და ტრენინგ-სემინარებში. მეწარმე ქალებმა ამ ტრენინგებიდან მიღებული ცოდნა და გამოცდილება საკუთარი ორგანიზაციის შემდგომი განვითარებისთვის გამოიყენეს.

ორგანიზაციის ხელმძღვანელი ნანა შარაშიძე, ბოლო 10 წლის განმავლობაში, ხელმძღვანელობდა არასამთავრობო ორგანიზაციას- „ქალი, ბავშვი და სოციუმი“, რომელმაც არაერთი სოციალური პროექტი განახორციელა. დღემდე აქტიურად მუშაობს სხვადასხვა ჯგუფის გაძლიერების მიმართულებით, წარმატებით უძღვება საოჯახო მეურნეობა „დომკანას“.

ძალიან დაეხმარა პროექტს ხაშურის სამუზეუმო გაერთიანების ფონდების მცველის, ისტორიკოსი-ეთნოგრაფის, მზია ლობჯანიძის გამოცდილება, რომელიც სოფლის ფესტივალის ჩატარების იდეების აქტიური მხარდაჭერია. იმის გათვალისწინებით, რომ სოფ. წაღვლში, ადგილ „მიქელაანთ ვერხვებში“, N94 სამარხში ხაშურის არქეოლოგიური ექსპედიციის მიერ (ხელ-ლი: ალ. რამიშვილი) 1984 წელს, აღმოჩენილი იქნა უძველესი სალენი იარაღის, კვრის ნაშთები (რომელიც მეცნიერ არქეოლოგთა მიერ მიჩნეულია კავკასიაში პირველ კვრად), ფესტივალის ინიციატორებმა, სწორედ, ის გამოიტანეს ფესტივალის ლოგოდ.

ფესტივალი გაიმართა წაღვლისა და ბროლოსნის საჯარო სკოლების მოსწავლეების და ყველა ასაკის ადგილობრივ მკვიდრთა ჩართულობით. ფასტივალის ფარგლებში, წაღვლის საჯარო სკოლის ეზოში მოეწყო ავთენტური გლეხური დარბაზი, სადაც წარმოდგენილი იყო ქართლის ამ უძველესი საცხოვრისისთვის დამახასიათებელი დეტალები. ფესტივალზე წარმოდგენილი იქნა ადგილობრივ მცხოვრებთა ყოფისა და კულტურის ელემენტები, ქართლის რეგიონისთვის დამახასიათებელი კულინარული

ნიმუშები(განსაკუთრებით, ქართლური შეჭამანდები-ყველის, მაწვნის, კვრინჩის, შინდის, ტყლაპისა და სხვ.), ხალხური რეწვის ოსტატთა ნამუშევრები(ნაქარგები, თექის ნიმუშები, ნაქსოვები), ეკოლოგიურ გარემოში შეგროვებული სამკურნალო მცენარეები. მასპინძლები სტუმრებს



სთავაზობდნენ ადგილზე მომზადებული მივიწყებული ქართლური წვნიანის, ე. წ. შეჭამანდების, ხაჭაპურების, ლობიანების, გულიანი ქალების, ხაბიზგინებისა და სხვათა დაგემოვნებას. პატარა ფოსტალიონებმა ფესტივალის ყველა მონაწილეს შესთავაზეს სხვადასხვა სახეობის ქართლური შეჭამანდების რეცეპტები. გაიმართა მინი-ჩემპიონატი ნარდში და სპორტის ძველ სახეობებში. გაცოცხლდა ქართული მივიწყებული თამაშები - ლახტი, კენჭაობა, შვიდექაობა, ნიშხა-ნიშხა - ბარბალუკა.

გამოვლინდნენ წაღვლის და ბროლოსნის საჯარო სკოლების



მოსწავლეებისთვის გამოცხადებული ესეების კონკურსის გამარჯვებულები თემაზე: „დავით აღმაშენებელი და წაღვლი“. ფესტივალის ორგანიზატორებმა სიგელებით დააჯილდოეს გამარჯვებული მოსწავლეები. სიგელები გადაეცა ფესტივალის იმ მონაწილეებს, რომლებმაც განსაკუთრებული ძალისხმევა გამოიჩინეს თავიანთი კულინარული ნაწარმისა თუ ნაოსტატარის წარმოჩენაში.

დიდი ინტერესი გამოიწვია ახალგაზრდებში ერთადერთი ადგილობრივი მჭედლის, რუზო გოგალაძის მიერ ხარების დაჭედვის ჩვენებამ.

ფესტივალი ხაშურის მეწარმე და შემოქმედ ქალთა ნამუშევრებმაც დაამშვენა. მათ მიერ წარმოდგენილი იქნა თექის, ქართული საეკლესიო ნაქარგობის საინტერესო ნიმუშები, ხეზე კვეთის ოსტატთა ნამუშევრები და სხვა.

ამ დღეს, სოფელ წაღვლს 150-ზე მეტი სტუმარი ეწვია, მათ შორის იყვნენ დონორი ორგანიზაციის, USAID-ის წარმომადგენლები.

„წაღვლი ფესტი - 2024“-ის უპირველესი მიზანი, ხელი შეუწყოს ხაშურის მუნიციპალიტეტის გამყოფი ხაზის მიმდებარე თემების შემოსავლის მომტანი საქმიანობის განვითარებას, ხალხური რეწვის პროდუქციის პოპულარიზაციას, ტრადიციული ხელოვნების ისტორიის წარმოჩენას და სოციალური ერთიანობას, შესრულებულია.

გრძელვადიან პერსპექტივაში იგი ხელს შეუწყობს გამყოფი ხაზის მიმდებარე სოფლების განვითარებას, ადგილობრივ მკვიდრთა მიერ ტრადიციული რეწვის საინტერესო სახეობების გადარჩენას, შენარჩუნებას და პოპულარიზაციას, რაც, ერთგვარად, მიუხედავად სოფლებში ტურიზმის განვითარებასაც სხვადასხვა მისიით სტუმრად ჩამოსული ადამიანების მეშვეობით.

ასეთი ფესტივალები იძლევა საშუალებას რომ შევინახოთ, დავიცვათ და სიცოცხლე შევძინოთ ჩვენს კულტურულ მემკვიდრეობას.

ირინა გოგიტაური

„თბილისობის“ დღესასწაულს შიდა ქართლის რეგიონიც შეუერთდა

საქართველოს კულტურის, სპორტისა და ახალგაზრდობის სამინისტროს ინიციატივით თბილისის ეთნოგრაფიული მუზეუმში „თბილისობის“ დღესასწაული მრავალფეროვანი და მასშტაბური ღონისძიებებით აღნიშნა. საზეიმო ღონისძიებას, ტრადიციულად, შიდა ქართლის რეგიონიც შეუერთდა. წარმოდგენილი იყო ადგილობრივი მეწარმეების ნაწარმი და ნაკეთობები, მოეწყო მეთუნეობის მასტერკლასი, ასევე დამთვალეობის შესაძლებლობა ჰქონდა ენახა თონეში ნაზუქი ცხობის პროცესი და დაეგმოვნებინა ქართლის მარნების ღვინოები. გარდა ამისა, მოეწყო საჭიდაო მოედანი, სადაც სპორტსმენები დაინტერესებულ სტუმრებს ჭიდაობის ტექნიკებს აცნობდნენ.

მუზეუმში გამართულ ღონისძიებას კულტურის მინისტრის მოადგილე კობა ხუბუნია დაესწრო. შიდა ქართლის სახელმწიფო რწმუნებულის ადმინისტრაციაში აპარატის ხელმძღვანელმა ქეთევან ციმაკურიძემ გორის მუნიციპალიტეტის მერის მოვალეობის შემსრულებელთან სიმონ გულედანთან და ხაშურის მუნიციპალიტეტის მერის მოადგილესთან ზვიად გოგუაძესთან ერთად სტუმრებს შიდა ქართლის კუთხეში უმასპინძლა.

აღსანიშნავია, რომ თბილისის ეთნოგრაფიულ მუზეუმში უკვე მესამე წელია საქართველოს სხვადასხვა კუთხეების წარმომადგენლები ადგილზე მისულ სტუმრებს მათთვის დამახასიათებელ ტრადიციებსა და კულტურას აცნობენ.



ენყოფა ფოლკლორული კონცერტები, თეატრალური წარმოდგენები, ადგილობრივი სამზარეულოს, ღვინის კუთხეებისა და ქართული ტრადიციული რეწვის მასტერკლასები.



ხაშურში, მინდარის დასახლებაში, სკვერი მოეწყო

„ამ ეტაპზე, მშენებლობისთვის, მოსამზადებელი სამუშაოები მიმდინარეობს. პროექტის დასრულებული სახე, ძალიან ლამაზი იქნება. გათვალისწინებულია, დასასვენებელი სკამების, ფანჯატურების, საბავშვო ატრაქციონების, განათების მონტაჟი. იქნება მინი სტადიონი, დაირგვება სხვადასხვა ტიპის ხე-მცენარეები. სივრცე, ყველა ასაკის ადამიანის მოთხოვნებს დააკმაყოფილებს და ადგილობრივების საყვარელი ადგილი გახდება.“ - აღნიშნა სამუშაოების დამთვალეობისას ხაშურის მუნიციპალიტეტის მერმა-თენგიზ ჩიტიაშვილმა.

ინფრასტრუქტურის სამსახურის უფროსის-გიორგი ჰაპიაშვილის განმარტებით, სკვერის მოწყობის სამუშაოები, თანადაფინანსებით განხორციელდება და ღირებულება-389 646 ლარს შეადგენს.



საქართველოს პარლამენტის არჩევნებში მონაწილე პარტიების საყურადღებოდ!

„საქართველოს საარჩევნო კოდექსის“ და ასევე, საქართველოს კომუნიკაციების ეროვნული კომისიის დადგენილების (2012 წლის 15 აგვისტო) შესაბამისად, 24 ოქტომბრის ჩათვლით, წინასაარჩევნო აგიტაციისა და წინასაარჩევნო რეკლამის განთავსებისათვის, გაზეთში „ხაშურის მოამბე“ გამოყოფილია ფართობი. კერძოდ: ფასიანი რეკლამისათვის გაზეთის მე-4 გვერდი (988 კვ.სმ), უფასო რეკლამისათვის კი გაზეთის მე-5 გვერდის ნახევარი (494 კვ.სმ.). ფასიანი რეკლამის შემთხვევაში, ერთი კვადრატული სანტიმეტრის ღირებულება შეადგენს 20 თეთრს (ერთი გვერდი - 197 ლარი და 60 თეთრი).

A3 და A4 ფორმატის ჩანართის შემთხვევაში (თუ ჩანართი გამზადებული სახით მოაქვს დამკვეთს და რედაქცია მხოლოდ ქსელში გავრცელების ვალდებულებას კისრულობს) კვადრატული სანტიმეტრის ფასია 15 თეთრი, ანუ A3 ფორმატის შემთხვევაში - 148 ლარი და 20 თეთრი, A4 ფორმატის შემთხვევაში - 74 ლარი და 10 თეთრი.

(გაგრძელება. დასაწყისი იხ. „ბმ“ 2023წ.#42, #43 2024წ.#2,#3, #4,5,6,7,8,9,10,11,12,15,15,17,18. #36,37,38)

მურმანისშვილის ნაზრევი - ადგ; სახნავი, სათესი. როგორც ჩანს სურამში ნაზრევი ქართლის სამეფო კარმა მურვანიშვილებს XVIII ს - ის 40-50 - იანი წლების მიჯნაზე უბოძა. ამასთან დაკავშირებით საბუთში, რომელიც 1767 წლის 26 აგვისტოთი თარიღდება, ნათქვამია: „...მეფემან საქართველოსამან, ქართლისა, კახეთისა და ყაზან-ბორჩალოს მპყრობელ-მქონებელმან, [თ]ანამეცხედრემან ჩვენმან დადიანის ასულმან დედოფალმან დარეჯან, ძემანჩვენმან... უფლისწულმან პატრონმან გიორგიმ, ლევან, იულონ, ვახტანგ, თეიმურაზ დამირიან, ძისა ძემან ჩვენმან დავით. ესე ამიერიტან უკუნისამდე ყამთა და ხანთა გასათავებელი სამკვიდროთ და საბოლოოთ გამოსადეგი მამულოს წყალობის წიგნი და სიგელი შეგიწყალეთ და გიბოძეთ შენ, ჩვენთა ერთგულთა და წესისაებრ ნამსახურს [მურვანის]შვილს იესეს, ქაიხოსროს, ზურაბს, გოგიას და ბიძაშვილსა თქვენსა შიომს. ასე რომ როდესაც ბატონი მამაჩვენი ყენთა[6] წაბძანდა, მა[ში]ნ თქვენი ბიძაშვილი შიომი თან ახლდა. დიდათ ერთგულათ მსახურა და იქ იმის ერთგულობასა და სამსახურში მიიგვალა. ამის სამუქვოთ ნეტარხსენებულს ბატონს მამაჩვენს სურამს ნაზრევი თქვენთვის ებოძებინა. მაგრამ იმის წიგნი როგორმე მამხდარიყო, რომ დაგკარგოათ. ახლა მოხვედით და [ი]მ წყალობის განახლებას დაგვაჯენით. შენ, ქაიხოსრო და შენი ძმა გოგია მცირენი ჩვენგან დაზრდილნი იყავით და დიდათ ერთგულათ და თავდადებით ჩვენი ნამსახური და მრავალჯერ ჩვენს წინ ჩვენს მტერზე კარგათ გარჯილნი და სახელიანათ დარჩომილნი. ამასდა გარდა, როდესაც ქართლიდან მომავალნი ვიყავით, დიდმის მინდორში ღამე ცოტა რამ ლეკი შემოგვხვდა. ღ[ვ]ითის მოწყალებით სწრაფად დამარცხდნენ და ყათლანი დაემართათ. თქვენ, სამნივ ძმანი, ქაიხოსრო, ზურაბ და გოგია თან გვახდით, კარგად გაისარჯენით, სამთავ თითო ლეკი დაგრჩათ და თავები მოგვართვით. ჩვენ, უწინდელი თქვენი ნამსახურობაც მოვიხსენეთ და ახლა ეს თქვენგან კარგათ გარჯაც გავძინეთ. ამისდა საჯილდოთ გიბოძეთ და დაგიმკვიდრეთ სურამს ჩვენი ნაზრევი თავის სამართლიანის სამძღვრით...“(სხვ. ად - 7019). 1797 წლის 9 მარტის საბუთში, რომელიც წარმოადგენს სოლომონ ხეროდინაშვილის მიერ გიორგი ვეზირიშვილისათვის მიცემული მიწის ნასყიდობის სიგელს, ერთ-ერთ საზღვრად დაფიქსირებულია მურვანისშვილის ნაზრევი: „...ნასყიდობის წიგნი და სიგელი დაგიწერინე და მოგეცი მე, ხეროდინასშვილმა მდივნისშვილმა სოლომონ... შენ ვეზირისშვილს ნასაღრიბაშის ნაიბს გიორგის... მოგყიდე სურამს შენის ზურის ბოლოს მიწა. არის ამ მიწის სამძღვარი... მეოთხე მხარე მურვანისშვილის ნაზრევის მიდგამდის...“(სსსსა, ფ.1450, დავთ.36/259). 1862 წლის 26 იანვარს ზურაბ მურვანოვის ქვრივმა ნაზრევის მესამედი მიჰყიდა შამელ ფიჩხაძეს: „...სოფელს სურამში მცხოვრებულმა აზნაურის ზურაბ მურვანოვის ქვრივმა და შვილმა ჩემმა ილიკომამ... მოგყიდე საჭიროებისათვის... თქვენ სურამშივე მცხოვრებულთა შამელ, დავით, აბრამა და ბინო მომეს ძეთ ფიჩხაძეთა სამკვიდრო მამული... ნაზრევის მესამედი..., რომლის სამძღვრები არიან: აღმოსავლეთით სურამში მცხოვრებულების არუწოვის ვენახი და ისრაელთ სასაფლაო, დასავლეთით შარა გზა და ჩრდილოეთით ისევე მურვანისშვილისადმი ნარგები ამავე ნაზრევის მესამედი და სამხრეთით ისხაკა მალაშვილის სახლ-კარი და ბაღი. ესე ნაზრევი თავის ჭურ-მარნითა და საწლანხნითა და საქაჩავის ქვებითა“.

ტოპონიმებში გაცოცხლებული ისტორიები

დედოფალთ-დედოფალმან პატრონმან მარიამ და ძემა ჩვენმან პატრონმან ვახტანგ, ესე უკუნისამდე ყამთა და ხანთა გასათავებელი წყალობისა წიგნი და ნიშანი შეგიწყალეთ და გიბოძეთ თქვენ, ჩვენთა ერთგულთა და თავდადებით ნამსახურთა ყმთა რუსაშვილს მურვანს, ძესა შენსა შალვასა და შვილთა თქვენთა იესეს, თამაზს და სახლისა მომავალთა ყოველთავე, მას ჟამსა ოდეს მოგვადეგით კარსა და მამულის წყალობას გვაჯენით. ჩვენცა ვისმინეთ აჯა და მოხსენება თქვენი, მოკითხული გიყავით და ამოვარდნილის დამაწაშულის ზაქარიას კერძი მამული, სახლ-კარი, მითითა, ბართა, ველითა და ვენახითა, ჭურ-მარნითა, შენითა და უშენითა, შესავლითა და გასავლითა, საძებრითა და უძებრითა, ყოვლითურთ უნაკლულად თქვენთვის და თქვენთა შვილთათვის გვიბოძებია... პირველად თქვენთვის გუებძებინა და ახლაც ამ სიგლით დაგვიმკვიდრებია და დარიბას ხოდაბუნი ამასწინათ საჯილდოდ გიბოძეთ და ისიც საბოლოოდ დაგვიმკვიდრებია“. XVIII ს - ის 20 - იანი წლებით დათარიღებული საბუთის თანახმად მამუკა ხიდირბეგიშვილი მას აძლევს მურვან მურვანიშვილს: „ესე წიგნი მოგეცე მე, ხიდირბეგისშვილმა მამუკამა შენ მურვანისშვილს მურვანსა და შენს ძმებსა. ასე რომე სადამალოწიურო შენი მამული ბატონმა მე მიბოძა. მე ახალციხეს წაველ. ჩემს ძმისწულს იმაში ხელი არა აქს. თუ იქილამ ჩამოსვლა აღარ მომიხდეს, შენი მამული შენთვის დამინებებია ყოვლის კაცისუცილობლათ“.

საქორის ხევი - ადგ; იგივეა რაც ბაიანთხეულა. სამების უბანი - ადგ; უბანი სანატორიუმი - ადგილი, გორაკი. ახლა აქ სანატორიუმი. სასურამო სანახირო გზა - ადგ; გზა. 1825 წლის 9 ივნისის საბუთში ბაკა მურვანიშვილის მიერ გლახა ხეროდინოვისათვის მიყიდული სერის მიწის „მეოთხე გვერდი სასურამო სანახირო გზა“ არის. საქოლაკი - ადგილი სამხრეთით მდ. სურამულას მარცხენა მხარეს. გადმოცემით აქ ძველად დამნაშავეებს ქოლაკდნენ. გვხვდება ძველ ქართულ საისტორიო ძეგლებში. 1731 წლის მარტის დასაწყისში აქ მიწა მიუყიდა ელია გუგუნაშვილს აბდულა თოფჩიაშვილისათვის: „...ესე ნასყიდობის წიგნი და პირი დაგიწერეთ და მოგეცით ჩვენ, გუგუნაშვილმა ელიამა და შვილმა ჩემმა შავლამა და ჩემმა ძმისწულმა შაბათამა თქვენ, თოფჩიაშვილსა აბდულასა და ძმასა ოსმანასა, სახლისა მამავალსა თქვენისასა. ასე რომე მოგყიდეთ საქოლაკზედა გზაზეთ მოძღვრისა მოცემული მიწა, ზეთი არონასშვილისა სურიელისა მიწისა მიდგამდის, ქვეით შენისა მიწისა მიდგამდის“.

1733 წლის 25 მაისს „...ბათინასშვილებმა კაკას შვილმა ელიამა და ბიძაჩემმა ებად[ა]მა, ლევა[ნ]მა და ბინიამა და ბიძაჩემმა კიკამა შენ, თოფჩიაშვილს აბდულასა და ძმასა შენსა შერმანასა და ძალლუასა, შვილსა თქვენსა სულიმანასა და თომასა, მოგყიდეთ საქოლაკზე ორი დღის მიწა. იქეთ გვერდზე შენის მიწის მიდგამდის, აქეთ ყობიას მიწის მიდგამდის, ბოლოს შენის მიწამდის, ზემო შარამდის“.

საწურბლე - ადგ; 1879 წელს აზნაურმა ლუარსაბ აბაზაძემ დათუა ჯობაძეს მიჰყიდა გასაჩეხი ტყე „სახელწოდებული ჯაფინაური“, რომელსაც ესაზღვრებოდა „დასავლეთით საწურბლე“.

მუხნარი - ადგ., მუხნარი. მწვანე ბაზარი - ადგ., იგივეა რაც ძველი ბაზარი. ნავენახარი - ადგ; 1862 წლის 26 იანვარს ზურაბ მურვანოვის ქვრივმა მიჰყიდა შამელ ფიჩხაძეს: „... ნავენახარი თქვენივე ვენახის თავზედ მდებარე... სამძღვრებთა შუა: აღმოსავლეთით გლეხის პავლე ჯობაძის მიწა, დასავლეთით სვიმონ ნებიერიძის მიწა, სამხრეთით თქვენივე ფიჩხაძეთა ვენახი და ჩრდილოეთით შარა“.

- ხელოვნება -

ლიკა შაინიძე - შემოქმედი, რომლის ნამუშევრები აღფრთოვანებას იწვევს

ლიკა შაინიძე თვითნასწავლი მხატვარია, პორტრეტებზე მუშაობს ნახშირით, ამბობს, რომ რთული ტექნიკაა, რომელიც შედგომებს ადვილად არ გაატიობს. მეორე წელია, ხაშურში ცხოვრობს, მხატვარ და მუსიკოს გიორგი სუხიაშვილის მეუღლეა, მათი სიყვარული და კავშირიც ხელოვნების და მხატვრობის სიყვარულიდან მოდის. ციხისძირიდან ხაშურში გადმოვიდა საცხოვრებლად და აქ განაგრძო აქტიური მუშაობა. ხატვის დაწყება, არც



გენტიკური ნიჭი ყოფილა, როგორც ამბობს, საკმაოდ გვიან დაიწყო, სიფრთხილით და თავმდაბლობით გამოიჩინა, გიორგია მისი სტიმული და ცდილობს, უფრო დიდი მხატვარი გააცოცხლოს მასში, რისი პოტენციალიც ნამდვილად აქვს.

-საკმაოდ გვიან, 14 წლის ასაკში დავხატე პირველად. თინეიჯერი ვიყავი, ფაქტობრივად, გადავხატე პლაკატიდან (საყვარელი მომღერლების და მსახიობების პლაკატებს ვაგროვებდით), მაშინ იმისი შესაძლებლობა არ იყო, ინტერნეტის საშუალებით შესწავლა რამე. სიმართლე გითხრათ, პირველი ნახატი, უფრო გადახატვა, არ გამომივიდა, მაგრამ არ დავნებდი, მეორედაც ვცადე, უკვე გავცა, მაშინ გადავწყვიტე, რომ შემეძლო ხატვა, თუმცა, რომ ვადარებ დღევანდელ ნახატებს, ძალიან სასაცილოდ გამოიყურება.



ჩემთვის ძალიან რთულია სიანლეების დაწყება, კომფორტის ზონის დატოვება, ამიტომ დიდი სიფრთხილით ვეკიდები ხოლმე ყველაფერ ახალს.

-პორტრეტების შემდეგ, სხვა ჟანრშიც ხომ არ სცადე ხატვა?

-პორტრეტების შემდეგ, ზღვის პეიზაჟების ხატვა დავიწყე. ზღვის პირას ვცხოვრობ და ბუნებრივია, ტალღების ხატვა დავიწყე, პორტრეტისგან განსხვავებით, გამომივიდა. აკრილში ვხატავდი. დავიწყე ქვაზე, ხეზე ხატვა, თუმცა ყველაზე კომფორტული სახატავად ტილო აღმოჩნდა.

-როგორ განვითარდა, შენი, როგორც დამწყები მხატვრის მომავალი?
-როცა ხატვა დავიწყე, არც მიფიქრია, რომ ჩემს პროფესიად იქცეოდა და მთავარ შემოსავლის წყაროდ. თანდათან სტიმული მომცა ახლობლების შეფასებებმა, რომ არ მეჩვენებოდა და შემეძლო ხატვა. ორი წელი ვხატე პორტრეტები, აბიტურიენტობის პერიოდში, დრო აღარ მრჩებოდა სახატავად. პროფესიად ისტორია ავირჩიე, რადგან მაშინ ბათუმში არ იყო სამხატვრო მიმართულებით ცოდნის მიღების შესაძლებლობა, ამის მიუხედავად, სულ ვფიქრობდი, რომ ამ მიმართულებითაც მიმეღო პროფესიული განათლება. მაგისტრატურაზე ხელოვნებათმცოდნეობის მიმართულებით ჩავაბარე, მიუხედავად იმის, რომ პრაქტიკული განათლება ვერ მივიღე,

თეორიულად ძალიან საინტერესო და საჭირო აღმოჩნდა ჩემთვის, როგორც ხელოვანისთვის.

-შეფასებები როგორი იყო?

-ისევ პორტრეტს უკავშირდება. კოვიდის პერიოდში, ბევრი თავისუფალი დრო მქონდა ხატვისთვის. მუშაობის პროცესში, ჩემ შედგომებზე დავიწყე ფიქრი და განალიზება. ამ პერიოდში, მომწერა ერთმა მხატვარმა, შემეფასა ჩემი ნამუშევრები. მოვლენები ისე განვითარდა, რომ ეს ადამიანი ჩემი მეუღლე გახდა.



-ყველაზე დიდი სტიმული, ან მოტივაცია, ან ძვრები, რა იყო, რამაც ისევ მოლბერტთან მიგიყვანა?

-რადაც დიდი ძვრები არ მქონია, ოთხწლიანი შესვენების შემდეგ, ბევრი ბრძოლა გავიარე ჩემს თავთან. არ მქონდა სურვილი ხატვის, მივიდოდი სახატავ მოლბერტთან და სურვილს ვკარგავდი. ერთ დღესაც, თავისთავად მოვიდა სურვილი, დამეხატა. მეგონა, დიდი შესვენების შემდეგ, არ გამომივიდოდა, თუმცა, იმაზე კარგად გამოვიდა, ვიდრე ოთხი წლის წინ, სტიმული აღმოჩნდა, ამის შემდეგ არ გავჩერებულვარ.

-გამოფენებში თუ მონაწილეობ?

-მქონდა რამდენიმე გამოფენა. ხაშურქალაქობაზეც მქონდა ჩემი ნახატები გამოტანილი, სადაც მიმა ამანათაშვილმა მომცა რჩევა, რომ მიუხედავად იმის, რომ პორტრეტები კარგად გამოგდის და დროა, სხვა სტილშიც მოსინჯო და ნახო შენი თავი-ეს ისეთი შეფასება და რჩევაა, რომელიც ახლოა ჩემთან და ყველაზე გასათვალისწინებელი.

-ახლა რა ეტაპზე ხარ?

-ძირითადად, შეკვეთებზე ვმუშაობ, ჩემი შემოსავლის წყარო ესაა. ასევე კომპანიაში ვმუშაობ, რამდენიმე მხატვარი ვართ გაერთიანებული, გვეგზავნება შეკვეთები და ვაგზავნიტ დასრულებულს.



-ჟანრი, რომელიც შენია და მხატვარი, რომელსაც გრძნობ?

-პეიზაჟი მომწონს, მარინისტული, ზღვის პეიზაჟები. პორტრეტების მხრივ, კარავაჯო, ძალიან ახლოსაა ჩემთან სტილისტურად. მიუხედავად იმის, რომ შავ-თეთრში ვმუშაობ, ეს სულაც არაა მარტივი, აქ ფერებიც უნდა იგრძნობოდეს, მეტი დატვირთვა აქვს.

-ალბათ, მკითხველისთვის, ძალიან საინტერესო იქნება, შენი და გიორგის გაცნობის ისტორია

-ჩვენი გაცნობის ისტორიაც, მხატვრობიდან იწყება, დიდი ხნის დასვენების შემდეგ, როდესაც სოციალურ ქსელში განვათავსე ჩემი ნახატი, გიორგის ძალიან კარგი შეფასება მოყვა. აღმოჩნდა, რომ მანამდე სულ მაკვირდებოდა, როგორც დამწყები მხატვარი.

გიორგი სუხიაშვილი: მუსიკოსი, მხატვარი:

-ძალიან სწრაფი ზრდა ჰქონდა, რაც ძალიან გასაკვირია მხატვრობაში. ბევრ მხატვარს ვიცნობ, რომლებიც განვითარებისთვის დიდ და ხანგრძლივ გზას გადიან, ლიკას შემთხვევაში, ეს იმდენად სწრაფად მოხდა და იმხელა ნახტომი იყო, გაოცებული დავრჩი და გადავწყვიტე, როგორც დამწყები მხატვრისთვის, სტიმული მიმეცა და გამომეხატა ჩემი ემოცია. რადაც პერიოდი აღარ ვეხმინებოდი, შემდეგ გავაქტიურდი და ჩავაკითხე ციხისძირში, კოვიდის პერიოდი იყო, შეზღუდული იყო ტრანსპორტის გადაადგილება, რადაც მანქანას ვაყვები. ვისერიწეთ ზღვის ნაპირზე, ვისაუბრეთ ხელოვნებაზე. ეს ურთიერთობა უფრო ინტენსიური გახდა, იმდენად, რომ სამი წლის შემდეგ, მეც ბათუმში ჩავაბარე ქვაზე კვეთის სპეციალობით და უკვე ხშირად მიწევდა იქით ყოფნა. ხელი ზუტად იმ ადგილას ვთხოვე, სადაც პირველად შევხვდით ერთმანეთს.

ლიკა:

-თოჯინების თეატრში ვმუშაობ, საბავშვო დეკორაციებს ვხატავთ ერთად. ის სირთულეები, რაც სხვა ქალაქში საცხოვრებლად გადასვლას აქვს, არ მქონია, რადგან გიორგი მეხმარებოდა ამ სირთულის დაძლევაში. სამსახურშიც მაძლევენ თავისუფლებას, მაქსიმალურად გამოვხატო ჩემი თავი.

-რადგან ხელოვანი წყვილი ხართ, ალბათ, გიფიქრიათ, სამომავლოდ, თქვენი ნიჭის განვითარებაზე, ერთობლივ კოლაბორაციაზე.

-ჯერ კიდევ გიორგის გაცნობამდე, მინდოდა, ჩემი სახელოსნო-სტუდია გამეხსნა, ერთად ყოფნის პერიოდში, უფრო მეტად დავფიქრეთ ამ იდეის განხორციელებაზე. უკვე პროცესში ვართ, გვინდა, ეს არ იყოს მხოლოდ სივრცე, სადაც მახლობლად ხატვას ვასწავლით, გვინდა, თეორიული ცოდნაც მივცეთ, რომ უკვე ჩვენგან წასულს, შეეძლოს პროფესიული ცოდნის გაგრძელება და აღარ დაჭირდეს დამატებითი რესურსის დახარჯვა. გარემო იყოს ისეთი, ხატვის გარდა, დასვენება და განტვირთვა რომ შეძლონ...

თ. ჯავახიშვილი

- ხ ე ლ ო ვ ნ ე ბ ა -

მანანა ჩხეიძე: ქალბატონი, რომელიც თეისგან უღამაზეს ნამუშევრებს ქმნის

თეჯა ქსოვილის შექმნის და დამუშავების ერთ-ერთი ყველაზე უძველესი მეთოდია და ქართული ხალხური შემოქმედების მემკვიდრეობას წარმოადგენს. ამ ქსოვილის დამზადება და მისი მხატვრული დამუშავება უძველესი დროიდან დიდ ადგილს იკავებდა საქართველოს კულტურულ, ესთეტიკურ და ეკონომიკურ განვითარებაში. ენციკლოპედიური მონაცემებით, თეჯა-მოთელილი მატყლის საფენი ქეჩია, ამზადებენ თუშეთში, კახეთში, ხევსა და ჯავახეთში. მწყემსები და მეცხვარეები მთაბარობისას, თეჯას იყენებენ კარვების



გადასახურად. სახიანი თეჯის საუკეთესო ნიმუშები („ნაბადი“) მზადდებოდა თუშეთში. თუშური თეჯა გამოირჩევა მარტივი და დახვეწილი ორნამენტით. თეჯაზე რატო გიყვებით? გეტყვით:

გაზეთის ერთგული მკითხველი შეამჩნევდა, რომ პერიოდულად და დიდი სიამაყით წარმოგიდგინებ ხოლმე სხვადასხვა პროფესიის ქალბატონებს, რომელთაც ერთი საერთო ნიშანი, ხელსაქმე აერთიანებთ. ამჯერად, ფაქტობრივად, 2024 წლის „ხაშურქალაქობის“ აღმოჩენას, ქალბატონ მანანა ჩხეიძეს გაგაცნობთ. იგი ხაშურის მუნიციპალიტეტის სოფელ ქვიშხეთის საბავშვო ბაღის პედაგოგი და ქვიშხეთის კულტურის ცენტრის მთავარი სპეციალისტია. მანანა ჩხეიძე ქვიშხეთელია, ხელსაქმე დედამ შეაყვარა და რამდენიმე წლის უკან თეჯის რეწვაც სრლიად შემთხვევით შეისწავლა.

- დედა ქარგავდა ძალიან კარგად და მე და ჩემი და ვსწავლობდით. დედა გვაძლევდა საშუალებას, რომ გვესწავლა, გვავიწყობდა ხელსაქმით. შეგვიძენდა მულინა ძაფებს, გამოყავდა ლამაზი ორნამენტები, გვინატავდა კონტურებს და



შემდეგ ვაკეთებდით ნაფენ ნაქსოვს. ეს არის ურთულესი... ასე ვთქვათ, კარგად დახველოვდით. ჩვენს ყმაწვილობაში იყო, ეგრეთ წოდებული, „უკრაინკა“ სამოსი, რომელიც ჩვენი ხელით იყო მოქარგულ- მოკაზმული და თავს ვიწონებდი. ნათესავებისთვისაც ვირჩებოდი.

იმ პერიოდში, როდესაც მანანა ჩხეიძე თეჯის რეწვის ხელოვნებას დაეუფლა, ტაშისკარის ბავშვთა სახლში მუშაობდა, სადაც ლიტვის საელჩოს პროექტი ხორციელდებოდა, ბავშვთა სახლებში იქმნებოდა სახელოვნებო წრეები. თავდაპირველად, ბავშვებს მინაწერის შესწავლა შესთავაზეს, თუმცა, მინაწერის რთული პროცესით არ დაინტერესდნენ... და ამ დროს, ბავშვთა სახლში მოვიდა ქალბატონი მაია გუდაძე, თეჯის მასწავლებელი, ფერად - ფერადი მატყლით,

თეჯის ნემსებით და სხვა საჭირო მასალებით. ბავშვებს თეჯის რეწვა მოეწონათ. ბევრი მათგანი ჩაერთო თეჯის სახელოვნებო წრეში, შეიქმნა უამრავი ნამუშევარი, ქმნიდნენ დიდ პანოებს...

- იმ პერიოდში, მე ბავშვთა სახლში ვიყავი პედაგოგი და არასოდეს მენახა თეჯა და მისი დამუშავების პროცესი. მთელი არსებით ჩავერთე თეჯის დამუშავების შესწავლაში, ვხუმრობდი ხოლმე, რომ მაიას საუკეთესო მოსწავლე ვიყავი... მოკლედ, ვახამებდი ფერებს, ვიშველიებდი ფანტაზიებს და ვქმნიდი პატარ-პატარა კომპოზიციებს.

- და აქედან დაიწყო თქვენი თავგადასავალი თეჯასთან?..

- აქედან დაიწყო, კი. დაახლოებით 2010 წლიდან. დავდიოდი უნივერსიტეტში „თბილისში“, ვიძენდი მასალას, თეჯის ნემსებს... თეჯის დამუშავება ძალიან რთული და შრომატევადი პროცესია, საჭიროებს ცალკე სივრცეს, სპეციალურ ნემსებს, სპეციფიკურ დამუშავებას. ასე დავიწყე და რამდენიმე ნამუშევარი გავეყიდე „შარდენზე“. სხვათაშორის, უცხოელებმა შეიძინეს. ბევრი ნამუშევარი გვაჩუქე. განსაკუთრებით ვჩუქნიდი ისეთ ადამიანებს, ვინც ხელით რეწვის, ხელით ნამუშევრების ფასი იცოდა. ჩემი ერთ-ერთი თეჯის ნამუშევარი, ძველი თბილისის კომპოზიცია, ეხლაც ინახება ცნობილი ქართველი მხატვრის ნათელა იანქოშვილის ოჯახში, ბუხრის თავზე. ასევე ერთი ნამუშევარი ინახება მარინა ნიკოლაშვილის, ქართველი მეწარმე ქალის ოჯახში, რომელიც ქვიშხეთში გვსტუმრობდა ხოლმე, აღფრთოვანებული იყო მსგავს ნამუშევრებზე და მას ვუსახსვრე სიამოვნებით.

- გაგვაცანით თქვენი თეჯით ნამუშევრები...

- ამ წუთისთვის სახლში მაქვს რვა ნამუშევარი. მათ შორის „კალები“, ძველი თბილისის პატარა უბანი, ქართულ ეროვნულ მოტივებზე მაქვს ნამუშევარი, ვაზი, ქვევრი, ორშიმო. მაქვს თეჯით გაკეთებული ხევსურული ორნამენტი და გაკეთებული მაქვს რიჩა, ის რაც დამრჩა ჩემს მესსირებაში ნანახიდან, რიჩის ტბა, პატარა აფრიანი ნავი და ტაძარი ტყის სიღრმეში. თუმცა დიდი ხანია აღარ შემიმატებს ნამუშევრები. ამ ზაფხულს მქონდა სურვილი დამეწყო კვლავ მუშაობა. მაგრამ დრო ვერ გამოვანახე...

- ფართო საზოგადოება თუ გიცნობთ ამ კუთხით? თუ გამოგიფენიათ ნამუშევრები დამთავალიერებლებისათვის?

- ჩემი ნამუშევრები პირველად გამოვიფინე საბავშვო ბაღების გაერთიანების მიერ 1 ივნისს, ბავშვთა დაცვის დღესთან დაკავშირებით ორგანიზებულ ღონისძიებაზე. არ ვარ აქტიურად ჩართული გამოფენებში, თუმცა მახსენდება, რომ კიდე ერთხელ ჩემი თეჯის ნამუშევრები, გამოვიფინე ბაიანთხევი „არტგენის“ ფესტივალზე. და ბოლოს, წლეულს „ხაშურქალაქობაზე“. დამთავალიერებლებისთვის შევარჩიე სამი ნამუშევარი. და დიდი დაინტერესება და მოწონება დაიმსახურა.

- ნამუშევრებისთვის კომპოზიციებს თავად ქმნით?

- კი მე თვითონ. არანაირი ფოტოდან გადაღება. ამ ეტაპზე ვმუშაობ „მზესუმზირებზე“, რომელიც დიდი ხნის წინ დავიწყე და არ მაქვს დასრულებული. თეჯისგან ვამზადებ სათითაოდ მზესუმზირის მარცვლებს. ცხელ წყალში ვამუშავებ თეჯის ბურთებს, რთული პროცესია, თუმცა აუცილებლად უნდა დავასრულო...

- ასეთი დაინტერესების შემდეგ მაინც, არ გეგმათ გააქტიუროთ თეჯის რეწვა, შექმნათ კვლავ ნამუშევრები და გამოფინოთ?

- კი, როგორ არა, ვგეგმავ გამოფენა გავაკეთო ქვიშხეთის დიმიტრი ყიფიანის სახლ-მუზეუმში, სიმბოლურად არის ალბათ, ქვიშხეთელი ვარ და ქვიშხეთში გამოვიფინო ჩემი ნამუშევრები.

- ქალბატონო მანანა. ამბობთ, რომ თეჯაზე მუშაობა შრომატევადი, ხანგრძლივი პროცესია, დიდი დროს მოითხოვს, თქვენთვის ეს პროცესი რა ემოციაა?

- უი, ძალიან სასიამოვნო პროცესია, თავიდანვე რომ გამოიკვეთება კონტურები და ხვდები რომ ის გამოდის, რაც ჩაიფიქრე. თეჯაზე მე ვმუშაობ რთული, განსხვავებული ტექნით, მთლიანად ვმუშაობ თეჯის ნემსით, ფაქტობრივად, არის თეჯა ნაქარგი.

ქალბატონი მანანა დეტალურად გიყვება თეჯის დამუშავების მისულ ტექნიკას, როგორი სიფაქიზით და სიზუსტით მუშავდება მცირე დეტალები, რომლებიც შემდეგ კომპოზიციას ქმნიან. ამბობს, რომ თეჯა ნაქარგი რთული, მაგრამ მისთვის ძალიან სასიამოვნო პროცესია. რამდენიმე ხნის უკან, თეჯის დამუშავების მასტერკლასებიც კი გაუმართავს საბავშვო ბაღის აღსაზრდელების დედებისათვის „მშობელთა ჩართულობის“ ფარგლებში და მშობლებიც დიდად დაინტერესებულან. პატარების სამოსისთვის მცირე დეტალები დაუშადათ. გპირდებით, როდესაც ქალბატონი მანანა თეჯის „მზესუმზირებს“ დაასრულებს, სხვა ნამუშევრებსაც შექმნის თეჯისგან და გამოფენს, ჩვენი გაზეთის ფურცლებზეც დაბრუნდება და მის შემოქმედებით სიახლეებს კიდევ ერთხელ გაგაცნობთ.

თ. ახალკაცი

ჯემალ მარკოზაშვილის ხსოვნას

ჩვენს ქალაქს, საბედნიეროდ, ყოველთვის ჰყავდა ისეთი ადამიანები, რომლებიც ერთგვარად, ქმნიდნენ ქალაქის საერთო სახეს და თავისი ღვაწლითა და მოღვაწეობით, ხაშურს მთელს ქვეყანას აცნობდნენ.

ერთ-ერთი ასეთი იყო ჯემალ მარკოზაშვილი, კაცი, რომელმაც მთელი თავისი სიცოცხლე დაუკავშირა ხაშურს და იმდენი შეძლო, რომ მის სახელს დიდხანს არ მიადგება დავიწყების მრუმე ჩრდილი. საუკეთესო სპორტსმენი, რაიონის და ქვეყნის პატრიოტი, მუდამ იმისთვის იღვწოდა, რომ სიყვარული დაეთესა და ხეკეთილი ენარებიანა. შეძლო კიდეც, პეშ-პეშ აგროვებდა სიკეთეს და უშურველად გასცემდა ყველგან. ცხოვრებამ უმძიმესი ტრავმებიც დაატეხა თავს, მაგრამ ღირსება არასდროს დაუკარგავს. ახალგაზრდობაში, ჯერ საუკეთესო ფეხბურთელად დამახსოვრა ქალაქს თავი, შემდეგ კი „ივერიის“ უფროსი მწვრთნელის რანგში გუნდს ლიდერებს შორის დაუმკვიდრა ადგილი.



მძიმეა დანაკლისი, მძიმე განცდა, რომ ეს კარგი კაცი ჩვენს გვერდით აღარაა, თუმცა, მისი ღირსებით განვლილი გზა, იმედს გვიტოვებს, რომ უფალი სანთელ-ნათელს არ მოაკლებს. ჩვენ კი მეოხად დაუდგებით მაცხოვარს, რომ მარადიულ და ღვთისმშობლის მადლით გაბრწყინებულ სასუფეველში დაუმკვიდროს ადგილი.

მეგობრები

ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი და გაზეთის რედაქტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27. E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499. P-ით მონიშნული სტატია იბეჭდება დაკვეთით გაზეთი იბეჭდება თბილისში.